

Demnach aber D. Beuther / daß er ein solches Secretum oder dessen Wissenschaft / auch ihme seinem Freundt dergleichen zu offenbahren versprochen / vnd zugesagt haben solte / im geringsten nicht geständig seyn wollen ; Jedoch dessen vnerachtet / sey offterwehnter D. Beuther in scharpffe Custodiam ein geraume zeit hingewiesen / vnd solch Secretum von sich zugeben vnd zu offenbahren / hart angestrengt worden / darauff er / auff vorhergehende ernstliche Befelch vnd scharpffe Betrohungen / dieser beschwerlichen Custodien sich zuentschütten vnd zuentledigen / diesen schriftlichen Bericht verfertiget / vnd Churfürsten Augusto vberschicket haben solle.

Weiln ich dann dieser Sachen halben / mit vnderchiedlichen der Chymischen Kunst Liebhabern / hin vnd wider Conuersation vnd Vnderredung gepflogen ; Als ist dieser D. Beuthers Bericht / von etlichen vielen zum offtern von mir zu communiciren / gefordert vnd fleißig begeret worden : Habe demnach denselben h. ermit zu gratificiren Ihn in Truck befürdern / vnd E. Gn. auch E. Str. vnd V. vnderthänig vnd dienstlich dediciren vnd zuschreiben wollen / auß Ursachen / weiln mir nicht vnberuust / daß dieselbe zu der Chymischen Philosophia sonderbahre Lieb vnd Affection tragen / auch von hohen Artis & Naturæ